

四庫全書

集部

欽定四庫全書

粵西詩載卷六

桂林府通判汪森編

七言古

四愁詩

漢張衡

我所思兮在桂林
欲往從之湘水深
側身南望涕沾襟
美人贈我金琅玕
何以報之雙玉盤
路遠莫致倚惆悵
何為懷憂心煩傷

陳臨歌

後漢陳臨字子然為蒼梧太守民有遺腹子報父仇捕得繫獄臨傷其無子令其妻

入獄遂產得男郡人歌之

蒼梧府君惠及死能令死人不絕嗣

蒼梧陳君恩廣大令死罪囚有後代德參古賢天報施

桂州三月三日

唐宋之問

代業京華裏遠投魑魅鄉登高望不極雲海四茫茫伊昔承休盼曾為人所羨兩朝賜顏色二紀陪遊宴昆明御宿侍龍媒伊闕天泉復幾迴西夏黃河水心劍東周

清洛羽觴杯苑中落花掃還合河畔垂楊撥不開千春
獻壽多行樂柏梁和歌攀睿作賜金分帛奉恩輝風舉
雲搖入紫微晨趨北闕鳴珂至夜出南宮把燭歸載筆
儒林多歲月襟被文昌佐吳越越中山海高且深興來
無處不登臨永和九年刺海郡暮春三月醉山陰愚謂
嬉遊長似昔不言流寓歎成今始安繁華舊風俗帳飲
傾城沸江曲主人絲管清且悲客子肝腸斷還續荔浦
蘅皋萬里餘洛陽音信絕能疎故園今日應愁思曲水

何能更被除作伴誰憐合浦葉思歸豈食桂江魚不求
漢使金囊贈願得佳人錦字書

送田少府貶蒼梧

高適

沈吟對遷客惆悵西南天昔為一官未得意今向萬里
令人憐念茲斗酒成睽間停舟歎君日將宴遠樹應連
北地春行人却羨南歸雁丈夫窮達未可知看君不合
長數奇江山到處堪乘興楊柳青青那足悲

長相思

劉復

長相思在桂林蒼梧山遠瀟湘深秋堂零落倚金瑟朱
顏搖落隨光陰長宵嘹唳鴻命侶河漢蒼蒼隔牛女寧
知一水不可渡況復萬山修且阻綵絲織綺文雙鴛昔
時贈君君可憐何言一去瓶落井流塵耿滅金爐前

入桂渚次砂牛石穴

劉長卿

扁舟傍歸路日暮瀟湘深湘水清見底楚雲淡無心片
帆落桂渚獨夜依楓林楓林月出猿聲苦桂渚天寒桂
花吐此中無處不堪愁江客相看淚如雨

江樓送太康郭主簿赴嶺南

對酒憐君安可論當官愛士如平原
料錢用盡却為謗食客空多誰報恩
萬里孤舟向南越蒼梧雲中暮帆滅
樹色應無江北秋天涯尚見淮陽月
驛路南隨桂水流猿聲不絕到蠻州
青山落日那堪望誰見思君江上樓

寄韋珩

柳宗元

初拜柳州出東郊道旁相送皆賢豪
迴眸炫晃別羣玉獨赴異域穿蓬蒿
炎烟六月咽口鼻胸鳴肩舉不可逃

桂州西南又千里灘水鬪石麻蘭高陰森野葛交蔽日
懸蛇結虺如蒲萄到官數宿賊滿野縛壯殺老啼且號
朝行夜坐設方略籠銅枹鼓手所操奇瘡釘骨狀如箭
鬼手脫命爭纖毫今年噬毒得霍疾支心攪腹戰與刀
邇來氣少筋骨露蒼白滯汨盈顛毛君今矻矻又竄逐
詞賦已復窮詩騷神兵廟略頻破寇四溟不日清風濤
聖恩儻忽念行葦十年踐踏久已勞幸因解網入鳥獸
畢命江海終遊遨願言未果身益老起望東北心惴惴

傷歌行

元和中楊憑
貶臨賀尉

張籍

黃門詔下促收捕京兆尹繫御史府出門無復部曲隨
親戚相逢不容語辭成謫尉南海州受命不得須臾留
身著青衫騎惡馬東門之外無送者郵夫防吏急喧驅
往往驚墮馬蹄下長安里中荒大宅朱門已除十二戟
高堂舞榭鏤管絃美人遙望東南天

諷虞嬪詩

井序

宋柳開

湘水道全州城下北走州之境又獨能產筠竹成紋

古書今俗通謂舜二妃溺於沅湘揮淚為竹斑者在
此也復東南望九疑山纔可百數里州岸佛寺傍有
妃廟因諷妃事作七言十九句詩一章刻石留於妃
廟中

惟堯則天舜弗復誕妃罔極恩亭育過密無間血盈目
南巡胡為淚染竹父輕夫重當何淑沅湘岼筠烟莓覆
凝紋疊斑殷郁郁猿緣鼯號鉤轉宿朋淒助惋聲幾哭
賸疑下尤禹堙瀆功充民戴荷百祿重暉並耀難停轂

元居不寧逝如逐悲啼負冤生莫卜卒顛沈瀾遠昌族
謳訟肇私歸永福柔陰慘尅咎深速前睇九山排矗矗
到今雲顏愁可掬

留題龍隱巖

李師中

過江緣磴尋溪垠隱然絕壁天開門傳云此處昔龍隱
陰巖凜凜猶疑存風雲已與時變會苔蘚尚迹初潛痕
嗟余出處不自重遇事輕發難為神

吾謫海南子由雷州被命即行了不相知至梧迺

聞尚在藤也旦夕當追及作此詩示之

蘇軾

九疑聯綿屬衡湘蒼梧獨在天一方孤城吹角烟樹裏
落日未落江蒼茫幽人拊枕坐歎息我行忽至舜所藏
江邊父老能說子白須紅頰如君長莫嫌瓊雷隔雲海
聖恩尚許遙相望平生學道真實意豈與窮達俱存亡
天其以我為箕子要使此意留要荒他年誰作輿地志
海南萬古真吾鄉

送人移知賀州

曾鞏

溪石膠船秋瀨微南山巉空勢嵯巍風露氣嚴花草緋
天色濛濛初雁飛君子往守東南圻旛旆綵錯如翔翬
象齒照地榮笏衣先後隸從何頗頗初君治縣參德威
吾人涵濡樂以肥念今奪去失所依出者遮行居者希
我思羣公坐天圍心與星斗爭光輝薦賢縮舌言無違
迅若發石乘高機何此茂器時所稀噤無一語為發揮
敢作此什傳王畿旦暮璽書來勅歸

和范信中寓居崇寧遇雨二首

黃庭堅

范侯來尋八桂路走避俗人如脫兔衣囊夜雨寄禪家
行潦升階漂兩屨遣悶悶不離眼前避愁愁已知人處
慶公憂民苗未立旻公憂水水推去兩禪有意開壽域
歲晚築室當百堵他時無屋可藏身且作五里公超霧
當年游俠成都路黃犬蒼鷹伐狐兔二十始肯為儒生
行尋丈人奉巾屨千江渺然萬山阻抱衣一囊遍處處
或持劍掛牢上回亦有酒罷壺中去昨來禪榻寄曲肱

上雨傍風破環堵何時鯤化北溟波好在豹隱南山霧

江月樓

秦觀

仙翁看月三百秋江波日去月不流肯因炎塵暝空濶
真與江月同清幽蒼梧雲氣眉山雨玉簫三弄無今古
九天雨露蟄蛟龍琅玕長凭清虛府

全州捲烟閣

王鞏

長江縈村若練帶晴岫插天如畫屏山青水秀兩奇絕
道人對此開禪局紅塵一點飛不到舉手高可摩天星

除名

鄒浩

前年除名竄新州今年除名竄昭州我名無實浪自得
坐此人間多怨讐恩深天地貸斧鉞除之又除名不留
雖然未即聽逐便已覺此身民是僇裂冠毀冕散車馬
幅巾杖屨西南陬行者爭道舍爭席所向爾汝紛應酬
洞山有語久弗契忽然一笑知來由我追我隨非我患
那用避如韓伯休

留別張雲立之

立之昭
士也

來仙夢破知何處君今歸去仙宮路江頭舟楫嶺頭雲
曾許乘風邀月住倏然三載與君同信我此心如白鷺
白鷺忘情亦有情君更情多無量數天繪亭前不忍分
遠送我來欣進步霜凋萬木見孤松顏色青青獨如故
湘南湘北舊光陰從此回頭但烟霧得志軒前藕未花
梅率小桃先已露與君同醉復同醒千頃池塘渺新霽
好隨魚躍趁風雷飛上青天休反顧

桂林二十四巖洞歌二首

趙夢

秦皇開郡為桂林古號名邦五嶺陰山琢玉簪攢萬疊
江分羅帶繞千尋青青四顧列羣山生自天工巧若鐫
玲瓏拔地聳層秀崢嶸嵯峨星斗間其中有巖十二所
伏波靈顯存祠宇顏公讀書窟室中疊綵北山如列布
何年龍隱冲霄去鱗鬣形模鑱石路仙人劉公飛升時
巖壁宛然遺舊題穿雲仙迹次左右清虛道氣多南谿
白雉聽經生人類蕭寺豐碑有元記信知一性無不通
石竇陰陰苔蘚蒙西南中隱尤勝絕穿處得名因吕公

曾公程公皆舊迹

三公皆桂帥也

遺愛在民傳古昔沈沈巖谷

有餘光炎方勝概神難藏周迴不遠郭郭下輪蹄追賞

何忙忙

宜人之地少陵詩閱玩前賢詞意竒爛然五詠非虛語
位壓坤方占一維青青四顧列羣山生自天工巧若鑄
玲瓏拔地聳層秀崢嶸嵯峨星斗間其中有洞十二所
七星山下棲霞府日月華君顯迹靈遇者當時鄭冠卿
歸到人間已三載仙洞光陰時未改至今舊記傳無窮

玄巖蟠螭聞白龍一泓澄碧寒潭瑩水月圓明下翠峰
枕城樓觀環俯視綠鏤喬林春日媚秦碑柳記已難觀
灘水南流泛渺漫慶林巽穴玄風出華景高明隱丹室
西方虛秀貫山腰南華朝陽風景饒夕陽北牖通仙徑
白雀嘉蓮池渌淨許多佳致卒難題留與詞人賡雅詠
客惠賓州竹簟甚佳取退之鄭羣贈簟詩讀之數

過成古風云

鄭剛中

卷送風漪光八赤竹新漸作琉璃色世人貴耳便賤目

那知不抵蘄州笛年來媿汗常決膚夏日自嫌汗枕席
有時追誦法曹句悵恨宗人不多得山齋置榻容一身
君惠清涼到心骨門前客至莫見嗔老子解衣喧鼻息

與曹聖延游玄風洞及七星觀賦長句

有序

李彥弼

宜春曹邁聖延廬陵李彥弼端臣凌商衢絕湍桴挾
隨車之霧潤探空穴之薄膚於是七雲子甌酪奴討
文圓之菁英研道樞之虛無恍契夫禦寇之冷然歛

翺乎寥陽之清都政和七載丁酉七月上瀚日

文英子建聲華烜少陵嘗詠波瀾濶遐流亶亶鍾宜春
觀君紫芝真秀拔華山騷耳汗血孫奚取王良手芻秣
駸駸凌厲追遺風胡為頓纓馳駱越誰嗟長庚有老裔
壯齡直欲排紫闥初從附鳳矯飛翔晚乃射虎耽疎豁
強顏方喜安斗筭稟分何能塊主撮胸中琳琅第埃壘
自慙鈐鋒乏破割時過西鄰蘄發藥雷引玉泉澆膝渴
新商執矩蚤威令甘霖騰虛摧虐魃約君飄鳬泛滄漪

背負青天

闕

天關風來空穴襲髮毛刷腋涼颼振絺葛

泠然便擬子列游不待別起青蘋末徐躋七星趾山椒

杓魁敲虛狀旋斡近君白雪熱何有高談一激錐囊脫

扳肩作者古蹊徑餘事篇章隨擊鉢盤跌不減二革君

妙閱枯棋戰挑官光騶搖縱莫可留四序翩翩幾箭筈

頃看金柳流鶯鳴俄聽玉露叢蟬聒清輝默韻無絃琴

烏用檀槽揮一抹我方騷愁愁到骨潛睨蠹蟬眉目顰

徒操詩窮擁鼻吟

闕

或酒酣將月喝生平剛腸久已屈

賴爾匹夫難志奪故交紛紜翺亦霄大鈞播物昭窮達
德尊一代元坎坎坷儒腐百年決粗糲南溟垂翅雲翼收
北窓點卧霜鬚將病馬猶期春草長涸魚終需江水活
君行趨覲長安日軼興橫秋疇可過公卿傾風定援手
鴻造機緘由一撥江湖要作迥相忘靜言可笑相濡沫

蒙亭倡和長句

有序

張洵

嘉祐中經略吳公及即伏波品之左以為亭名蒙漕
使李公師中記之而鑱於品之崖亭久埋廢記亦湮

減紹聖改元龍圖閣胡公宗回帥桂林憲使梁公出
其家藏蒙亭記以觀由是知其亭之詳胡公斥基而
新之遂為殊偉之雄觀

桂林山水冠衡湘蒙亭正在灘水旁清流洄洑眩波光
高崖古木爭蒼蒼下有菱荷滿橫塘面面風來面面香
新詩一咏酒一觴爽氣渾如秋氣涼酒闌島下踞胡牀
汲泉煮茗沈烟長從容談笑聲琅琅水光山色增輝芒
東山蘭亭各一方風流兼追謝與王回頭塵事皆茫茫

為計不若行樂良恨我到此情難忘遙指白雲思故鄉

和韻

尚用之

江亭勝概冠三湘仁智所樂皆其旁翠岫俯映青羅光
上有喬木摩穹蒼亭下川遊覆銀塘水面風來笑語香
騷人相值喜飛觴雄辯清談五月涼飲餘相與坐方牀
論文日暮興何長佳篇疾讀韻琅琅直疑星斗煥光芒
格高調古說奇方況復筆法追二王事業無窮歎茫茫
丹鉛點勘策非良與公致道心可忘浩歌直造無何鄉

和韻

呂源

九溪灘水接瀟湘萬壑千崑羅水旁七星高聳生輝光
連天一色皆蒼蒼倚江景物似錢塘況有萬戶新醕香
古洞相對舉清觴文淵遺迹徒悲涼安得石枕與藤牀
夢想昔人風味長滿車薏苡勝琳琅流傳千載事微芒
男兒生即志四方將軍異代猶封王感時撫事心茫茫
顧我豈有籌策良報國志願不敢忘此身未暇歸江鄉

和韻

李彥

桂江繚繞通湖湘佳山四挿江之旁嵐光滴翠漾波光
岼頭秀木皆青蒼誰人築室枕西塘新荷敲風柄柄香
君嘗招我來携觴登臨樂臆生清涼倏思伏波離空牀
且及尊前飲興長紛劇雄辯聲何琅客傳俗事江亭芒
蠻歌蜚曲笑遐方應無夢怪楚襄王但驚歲月去茫茫
報國宜多為畫良功名未白何時忘此心疇敢憶家鄉

和韻

葉宗嚮

我行幾許踰沅湘直抵八桂灘水旁千山倒影搖溪光

秀色不借草木蒼茲亭構勝俯回塘野花風遞羅綺香
崑前伏波航羽觴一洗塵思生清涼疑有仙人白玉牀
壺中景迫日月長步此仙籟音琅琅世間名利真毫芒
此景不獨冠南方恨不築室輕侯王回首塵迹空渺茫
瞥去未必計非良其如樽酒情難忘恍然一夢五雲鄉

謁陶唐帝廟詞

張栻

宋淳熙四年靜江守臣張栻既新陶唐帝祠以二月
甲子率官屬祇謁祠下再拜稽首退而歌曰

溪交流兮谷幽山作屏兮層丘木偃蹇兮枝相樛皇胡
為兮于此留藹冠佩兮充庭潔芳馨兮載陳純衣兮在
御東風吹兮物為春皇之仁兮其天四時敘兮何言出
門兮四顧渺宇宙兮茫然

乾道癸巳臘後二日桂林大雪尺餘郡人云前此
未省見也郭季勇機宜賦古風為賀次其韻

范成大

憶昔北征秋遇雪穹廬苦寒不堪說飛花如席暗燕然

把酒悲歌度佳節健兒館客類西河鑄戶不容浮蟻泄
當時已分餐氈寧復夢游炎嶺熟忽逐梅花行萬里
又與故山輕話別天公恐我愁瘴霧十日號風吹石裂
同雲乃肯度嚴關一夜玉峰高巖嵒老榕翁密最先縞
穉竹朽虛時一折須知桂海接蓬瀛滿目三山白銀闕
不管樓高翠袖單但嫌酒淺金杯凸東郭先生履雖敝
詩情却鬪冰壺潔歸撚凍髭搜好句山館青燈對明滅
為憐協氣到黃茅何止森森松柏悅豐年作守會飽煖

羈宦思歸自愁絕豈無菊徑樂琴書亦有秫田供麴蘖
東岡雪後一犁春誰在陂頭憶調燮

虞帝廟迎送神樂歌詞

有序

朱熹

桂林郡虞帝廟迎送神樂歌者新安朱熹之所作也
熹既為太守張侯棧紀其新宮之績又作此歌以遺
桂人使聲於廟庭侑牲璧焉其詞曰

皇胡為兮山之幽翳長薄兮俯清流渺冀州兮何有眷
茲土兮淹留 皇之仁兮如在子我民兮不窮以愛沛

皇澤兮橫流暢威靈兮無外
潔尊兮肥俎九歌兮韶
舞嗟莫報兮皇之祐皇欲下兮儼相羊烈風雷兮暮雨
右迎神三章二章四句一章五句

虞之陽兮灘之滸皇降集兮巫屢舞桂酒湛兮瑤觴皇
之歸兮何許 龍駕兮天門羽旄兮繽紛俯故宫兮一
既越宇宙兮無鄰 無鄰兮奈何七政協兮羣生嘉信
玄功兮不宰猶彷彿兮山阿

右送神三章章四句

九日宴浮金亭

趙宗德

東山樹何青青鐔津水何泠泠茂樹可蔭流水可聽眉
山夫子能解事却于水邊樹下構危亭洪波浴日金錯
落瘴雲不雨烟濛濛風塵灑洞去天遠草木鬱鬱知地
靈盤州為愛黃華節携我登臨邀衆客假令有酒多似
藤江水豈能洗我胸中之鬱抑甘侯昆玉文武全傾蓋
交游五情熟故人亦有許判官清政平生心似鐵文采
風流喻幕賓曾陪驄馬清南越劉君元是薇省郎治民

有道多籌策，令簿懷才亦不羣。芳名皆在斯文列，儒林
龔魏兩茂學。逸氣直與青雲接，孟嘉落帽是何年。岍嶺
西風感前哲，天荒地老事茫茫。白髮無情滿頭雪，醒時
飲醉時歌尊。前要使衰顏酡不飲，奈此清興何。人生聚
會能有幾，江海親舊今無多。

游潯州南山

江邦佐

南山特地森奇峰，嶙峋惟石蟠虬龍。巨靈夜半擘山腹，
幻出巖竇相玲瓏。陰陽石罅滴瓊液，拂拂洞戶生天風。

宸章炳煥神物護斷碑零落蒼苔封稚川飛昇歲月久
丹竈灰冷留遺踪曉猿夜鶴自驚怨朝嵐夕靄常溟濛
我來依守困朱墨欲尋勝概嗟無從公餘乘興一登覽
萬像獻狀來無窮金莖濯露素秋節清涼不與世人同
憑虛孤嘯岼巾幘收拾爽氣歸胸中俗駕自憐難久駐
還作泠然御風去太息真仙杳不逢碧雲暮合空凝竚

跋余子壽所藏山谷書范孟博傳樓鑰

山谷晚在宜州或求作字山谷問欲何書則曰惟先

生之意山谷許以書范孟博傳或謂南方無復書山谷曰平時好讀此傳遂默誦而書之舊聞此說又知在上饒大夫家願見不可余子壽來入判幕博記善屬文偶談及此又出摹本及尊公跋語始知其為先世舊物也為賦長句

宜人初謂宜於人菜肚老人竟不振承天院記顧何罪一斥致死海南濱賢哉別駕眷遷客不恤罪罟深相親攘攘不容處城闔夜遣二子從夫君一日携紙句奇畫

引筆行墨生烟雲南方無書可尋閱默寫此傳終全文
補亡三篋比安世偶熟此卷非張巡巖巖汝南范孟博
清裁千載無比倫坡翁侍母曾啟問百謫九死氣自伸
別駕去官公亦已身雖既衰筆有神我聞此書久欲見
摹本尚爾況其真輟公清俸登堅珉可立懦夫羞佞臣
送葉任道教授之官靜江 葉適

太學奏文夸第一國子先生裏行立嶺南梅花太枯澁
花豈喚人人底急爐亭雪深叫孤鴻傳書為憇明光宮

雲翻雨覆古來有不如堂堂金石守

鐸嘴

劉克莊

州傳靈渠自秦始南引灕江會湘水楚山憂赭石畏鞭
鑿崖通塹三百里篙師安知有史祿割牲沈幣祀瀆鬼
我茲閣舟懷若人要是天下奇男子只今渠廢多人修
嗟乎秦吏豈易訾

秋高亭

趙必愿

秋空何太高秋風何太清秋露何太皎秋月何太明秋

山有素期秋水莫閒盟力此久病身試上高高亭上欲
駕扶搖下欲跳清冷手持紫玉簫跨鵬或騎鯨時吹復
時止霄壤隨縱橫回首天上人見我呼友生我言你能
許我三百六旬無一日之不秋則吾亦許你從此為道
遙之朋

礧巖

林 岳

嘗聞仙人渡海術授以尺杖如飛龍憑虛閉目不敢瞬
波濤洶湧喧天風茲巖山窟飛海岼直掃一澗聲何雄

瞑行千步水入耳明探萬壑雲生胸嶽崖滴乳芝玉脆
剌穴噴水蓮腮紅神仙縹緲在何許心平意定天為通
此行況復匪遊戲出門借問春耕農

楚南偉觀樓

陳峴

平生足迹窮遐陬一麾更守湖湘州西接懸崖五溪曲
南望渺極蒼梧愁天涯牢落孰慰意千嶂倒影三江流
千里脈絡茲要會意趣端與江山投羣峰四遶立碧玉
帶映林薄如雕鏤蚪蟠虎驟互起伏天作地湧非凡儔

郊村依約半洲渚
遠明天際來歸舟
湖南素號清絕地
一旦呈露疑神謀
作成英奇易舊觀
俗化遠與鄒魯侔
寄語後來毋泯沒
共保佳致傳千秋

綠珠渡

徐 噩

早出綠蘿村
晚過綠珠渡
日落白州城
草荒梁女墓
江水流古今
滔滔不相顧
今人不見古
時人依舊青
山路如故

全州南城

馮 岵

全州城南何壯觀石崖為趾江為壕凌落渡江騎馬去
空濛瘴霧漫綈袍遷迤過灘水小艇浮桐槽半渡急雨
雪舟師失飛篙雨餘山路水如注石齒犖确森戈刀馬
蹄轉側不得過有力如虎空皮毛地窮路盡處橫絕青
山高褰衣扶杖躡天險十步九顧愁猿獠長沙頓伏幾
百折背脊菌蠢盤鯨鰲馬瘦人力倦野濶風怒號薄暮
投宿驅濕厲析薪爨鼎燒村醪一杯酸澁不可嚥平原
督郵羞兒曹我行湖湘歷八郡政欲閱實寧辭勞才疎

病懶事多廢南山何日接蓬蒿清風明月共三友山猿
野鶴來二豪一江春水澄葡萄蘆花萬頃眠漁舸

梧州江上夜行

白玉蟾

雲去雲來幾點星城頭畫鼓轉三更草深螢聚渾成燐
月暗鶴飛惟有聲何處夜航鳴櫓過滄江如鏡烟半破
忽然長嘯驚沙鷗飛入前山不留個

初至梧州

夜半江風吹竹屋起挑寒燈憐影獨荒雞亂啼思轉多

點鼠嘯躍眠不熟舊曲情聲覺悲涼故園心眼時斷續
何當牽犬臂蒼鷹錦帽貂裘呼蹴踘

七星山玄元樓棲霞之洞

元陳孚

懸崖插天千尺餘下有靈穴呀空虛勢如瑤宮聳渠渠
茵茵浮動金芙蕖想當未判混沌初元氣旁魄不得舒
鬼斧鑿裂蒼崎嶇要令吞吐如蟾蜍浩浩大海東南瀦
洪濤蕩激痕未除白乳滴結色雪如伏翼倒懸啄瓊琚
滿洞雲烟誰所噓冷翠撲人濕衣裾直疑竅通崑崙墟

十二玉樓鈞天居日華月華佩璠璣天丁夾侍黃金輿
翻然而下騎鯨魚流鈴似有聲虛徐平生嗜山如狙狙
南窮衡岳北醫閭數年侍直承明廬章服政爾祠鷄鵠
今朝偶捧紫泥書雕題鳩舌開象胥見山忽覺形遽遽
三世熱惱為之舒手攀古藤倚枿櫚天風吹鬢寒蕭疎
山僧留我羹野蔬問我何時返樵漁人生六合一土苴
胡能戚施與蘧蒢有江可釣田可畲便當箸笠隨春鋤
冠卿何人墮泥淤郡邑鞭背生蟲蛆日之夕矣吾歸歟

欲歸更爲山躊躇

過邕州崑崙關

昨日過大林關酸烟毒霧山復山今日過崑崙關寒泉
怒瀉聲潺潺道傍榕葉密如織千柯萬葉巖崖間怪藤
倒懸一百尺霜雪不剥皮堅頑勢如蛟螭夭矯下絕壑
駐馬側視不敢攀老虺忽何來眼閃電光尾灣灣山童
驚顫髮卓豎勸我急勒金鞍還因思狄天使貌貅夜度
摧狂蠻上元燈火杳何處至今野燒痕爛斑我雖一書

生袖有青絲綸誓將報天子肯避路險艱
邕州南征士
三萬鐵甲未解寒恫瘝我身七尺不能勇
金符正爾羞
蒼顏鐵鞭一揮出關去孔雀飛下滄江灣

邕州

左江南下一千里中有交州墮鳶水右江西繞特磨來
鰐魚夜吼聲如雷兩江合流抱邕管莫冬氣候三春暖
家家榕樹青不凋桃李亂開野花滿蝮蛇挂屋晚風急
熱霧如湯濺衣濕萬人塚上蜚子眠三公亭下鮫人泣

驛吏煎茶菜莫濃檳榔口吐猩血紅
颯然毛竅汗如雨
病骨似覺收奇功平生所持一忠壯
荒嶠何殊玉堦上
明年歸泛兩江船會酌清波洗炎瘴

度摩雲嶺至思凌州

嵯峨摩雲嶺石壁如梯繞天頂
千年毒瘴鬱不消怒入
老楓結丹癭蒼莽思凌州懸崖結屋如蜃樓
寨門半掩
刀槲健隱隱雲際聞鳴牛奴獠下山健如虎
口紅如血
面如土手捧椰漿跪馬前
山虺水蟲間散俎對此停鞭

空自慨吾獨何為在荒裔他年周京王會圖願借丹青
寫椎髻

廣西謠

傳與礪

廣西謠一何悲水泠泠山淒淒寧逢徭賊過莫逢官軍
來徭賊尚可死官軍掠我妻與子

八十里山行

桂林之區徭賊雜處南有八十里之高山絕天綿延開
險阻賊人倚之作巢砦劫掠經年勢還大官軍收捕費

供給主將逡巡竟何待居民近山晝夜愁四下行人皆
白頭况聞良家半為賊官府貪橫仍誅求安得大聚邊
頭兵甲鑄田器盡鋤山高作平地高山平徭賊斃

狄武襄吟

楊維禎

賓州海月光團團劍花火樹燒爛斑將軍如內客未散
捷書已奪崑崙關當時諫官疑武士豈知辦賊遽如此
於乎銅面將軍今豈無世無丞相龐公甘老死

王將軍歌送瑞卿之荔浦巡簡

丁復

青天白日散五雲酒酣起別王將軍嶺右湘源五千里
君恩如天無遠邇百丈牽船上湘水蒼梧九疑雲旖旎
荔浦更在雲南頭若中小官君莫愁生徭亦是天所產
賦予五性為人儔渠豈不知官好惡怒則猖狂喜還樂
近日大官虎瞰之骨肉可羹髓可酪我官我強民爾弱
是乃不堪克性作前年道州殺人去太守萬戶走無路
賊去官歸歡聚醕彼日那知其故將軍舊是廣東使
屬州被患往相視此迹彼情知久矣今官况是徭之方

山巖迫小官無房未足展仁化但用謹備防出入買賣
無相妨往來見之等尋常殷勤趨庭使下拜喻以天子
仁聖臣忠良

送李光大之海北憲司書吏

我聞徽之黃山秀之聚三十六峰比如故吏而散去不
可數周環紆餘蛟鳳舞瘠之為石天所斧真宰重惜保
其故仙者不得開洞府李君乃生貌清古殷鑒周鼎冰
雪貯而有錦綉之肺腑丈夫用世當不負他年抱策上

京去蓬萊宮深隔烟霧弱水三萬不可度祭酒先生纔
見取慷慨登樓念鄉土奉檄南歸大江滸古木陰陰覆
韋布御史殷勤再三顧叩之使言見平素小却黃堂掌
書簿溷溷泥途塞中路白壁自持終不污前年妖蜚月
更吐天半秋風吹桂樹炳豹文章墮羣瞽八月錢塘潮
亦怒竟無愠色向人前但道命耶多謬誤行臺二十四
松廳衆更奇之交愛護百鳥啾啾徒下處一鷄空中肆
高舉憲司十道虞有罟紀綱庶政祛殘蠹三在炎荒鼎

而柱五羊八桂窮險阻基分南北海為部民黎雜居性
豺虎俗嗜相殘裸負弩濱水而採名蜚戶一從孟嘗去
合浦珠不更還遠無賈臺官擇人如善估以君政似王
夷甫長干置家坐空窶遣佐繡衣蘇病苦君今此行人
共許還珠奚翅瞻三語夷齊有心當弗沮君其勗諸報
明主道命之行澤施溥萬鍾之賜安厭予

詠清湘八景

有引

張鎮

湖南清絕嘗于瀟湘八景中見之天巧機緣具見於

此諦觀古人清絕之語信不誣也夫山川林麓樓觀
園剎從古勝概之地未嘗不以吟詠垂重方來清湘
雲泉竹樹景物清曠他郡罕有及者予三載於茲因
修志頗得其詳戲成八章題曰清湘八景雖未能步
武前哲然彷彿畫圖或可為此郡佳話云

柳山寸月

石梯百褶雲氣間
髯龍飛舞松聲寒
高堂虛迥庭草綠
一池天影浮琅玕
山中寸月在何許
人泊江灣清淺處

更無圓缺任陰晴炯炯孤光自朝暮

湘峽歸雲

日輪不動塔影高下視萬井如秋毫片雲飛來化為石
竹光滿地涼蕭騷莓苔一逕山門古斜轉山腰入花塢
更乘飈馭登甲亭手拂丹青快掀舉

盤石冰泉

層崖連延峭如壁蘚苔標作神仙宅紫霞縹縹樓觀高
下有清江漱寒碧涓涓山溜聲琳琅一泓浮動水花香

身心洗盡萬緣靜頓覺天宇皆清涼

華峰霽霧

曙鴉飛盡疎鐘鳴江雲帶霧籠曉晴羣山濛迷總一色
隱隱但見中峰青數家衡茅在叢薄時撫幽篁望城郭
賣薪買米人未歸且拂茶爐燒墜籜

龍洞清溪

靈巖如屋山勢雄寒氣顛顛神龍宮洞門陰深軒檻窄
一灣流水涵青銅壁間大士面如玉寶蓋圓光照空綠

晚風吹衣生羽翰細認落花溪九曲

礧巖飛瀑

華鬢結頂空翠寒飛泉千尺流不乾石田長春玉芝暖
時有雞犬窺還丹一圭巖竇隨火入白晝驚聞鬼神泣
有人飛馭凌星河蹴踏仙槎倚空立

合江曉漲

濕雲壓山山氣低葦汀蒲渚迷東西三山水勢互吞吐
森森欲與層樓齊大艘行空帆力穩小舟如葉驚眩轉

魚龍得意快騰驤
天池萬里風霆遠

赤壁秋燈

二妃廟荒倚汀樹
嚴城閉門人不渡
驛樓疊鼓燈火明
知有官船夜來去
巉巖絕壁山盡頭
枯藤菌蠢蟠蒼虬
手携洞簫喚孤鶴
西風擬繼坡仙遊

乳洞

王思勤

乳穴佳名久欣慕
茲遊直與心期副
今朝葉敗七枝筇
衰遲未覺攀躋苦
湘南懸想碧雲橫
桂嶺遙瞻烟靄暮

招提鐘磬出幽深
村野牛羊自來去
忽聞流水響潺潺
漸覩巖扃隔烟霧
山溪躡履亂崎嶇
翠壁題名雜新故
乍暎朱墨略官箴
稍覺追隨趣絕知
官裏少夸途
始信閑中無窘步
人生如此信可樂
誰向康莊塞歸路
苦醉生前有限盃
豁我胸中吟興助
早知富貴如浮雲
三歎歸田不能賦

伏波山歌

張湖山

桂林有山名伏波
蒼崖翠壁高嵯峨
山根陰崙透水府

神奸物怪交撓訶我來登山復尋峒直涉風浪攀藤蘿
無誰可問得名始賴有殘碣堪摩挲為言新息昔事漢
老矣矍鑠猶操戈提師振旅蹴蠻國下潦上霧寧憂那
仍聞意苾能禦瘴採之返載數駱駝一朝明珠肆讒口
倒囊投棄茲山阿有云昔人捕魚者龍宮竊入張網羅
適遭老髯耽晝寢攫取明珠懷青蓑自知至寶世希有
惟守可遺那歸他守稱賢侯不敢受亟命返璧毋蹉跎
洞名還珠此二說無乃好事相傳訛柳州使君老好古

扁舟況此曾經過重來邂逅請停楫君看此事當如何
使君無言若有得仰面長歎春風和肯將往事擾胸臆
為我呼酒傾金荷明朝酒醒湘水上引帆南去飛如梭
堯山冬雪 劉志行

洪濛一判天地曉萬古茲山青未了朔南聲教本一源
大地圖輿古無考玄冥此來事遊戲剪水作花南到地
臘前不識豐年瑞翻令粵犬雲間吠

舜洞秋風

當年大駕巡南中
薰兮時兮歌南風
太音九奏鳳凰集
真與塵世開盲聾
重華遠矣成飛仙
湘靈灑淚秋風前
天荒地老不可詰
秋風滿樹淒寒蟬

西峰晚照

青松翠竹凝烟光
畫屏半已歸蒼茫
牛羊歸來尚有日
日光倒射人影長
昔人已遠不可返
西山蕨薇春自香
世間萬事付一默
回頭明月升東方

東渡春瀾

一川晴日春溶溶小舟如葉隨春風微波搖人影不定
但見隔岸秋花紅觀瀾老子喜忘歸會心妙處難得知
何人江上喚船急驚起白鷺翩翩飛

訾洲烟雨

漁翁披蓑侵暮歸家家買魚趁晚炊沙汀草樹遠復近
一簇兩簇青冥迷蘆花深處歌竹枝人間風浪那得知
明朝雨過杜若長定有采藥仙人來

桂嶺晴嵐


青山山氣薄日色似霧非霧雲非雲我疑玉烟吹不斷
化作老桂香氤氲仙人振衣千仞岡對花酌酒傳瓊觴
一觴一詠聲鏗鏘吐出字字天葩香

青碧上方

上方無雲下方雨便有天上人間分漫空寶華沾不住
俯拾瑤草聞清芬金仙每以淨業故獨占瓊樓最高處
欲拋塵劫從之遊山下蒼生正辛苦

棲霞真境

丹霞翠壁非人間中有金鼎丹九還非雲非烟爛有色
常與紫氣浮玄關鐘聲敲破仙家夢又挾飛霞跨鸞鳳
世間風雨那得知我欲隨之塵業重



粵西詩載卷六

欽定四庫全書

集部

粵西詩載卷八

詳校官庶吉士臣瑚圖禮

主事銜臣徐以坤覆勘

總校官庶吉士臣朱銓

校對官庶吉士臣吳裕德

謄錄監生臣沈希曾

欽定四庫全書

粵西詩載卷七

桂林府通判汪森編

七言古

舜洞秋風

明嚴震直

隱隱重華洞玲瓏倚翠巒西風吹我衣八月生晝寒遙
知南巡日鑾輿此盤桓逝思阜民財五絃琴一彈至今
江上流水聲聲聲鳴咽鳴前灘

堯山冬雪

朔風從天來吹墮遙空雪灑向堯山頂相看最奇絕銀
河高插玉芙蓉上界紆開白銀闕安南驛騎如星馳正
是天寒歲暮時明朝却過桂陽嶺一路瓊花襯馬蹄

西峰晚照

桂陽之山青龍葱落日照耀金芙蓉炊烟漠漠滿林麓
雞犬聲隔平原中何當躡飛雲却上衆山頂舉頭遙望
大明宮不覺天風襲衣冷

東渡春瀾

東門有長渡綠漲如葡萄官權數往來小舟亦輕操渡
頭日落行人語歇馬停鞭恐遲暮皇華使節照中流長
嘯一聲驚白鷺

訾洲烟雨

訾洲人家隔烟雨訾洲樹色青無數山中朗讀柳子文
澗底空聞樵客語樵客語行人稀梨花千株寒食後落
日負新花下歸

桂嶺晴嵐

峩峩桂陽嶺，高出南斗上。
嵐蒸霧灑翠不乾，玉削芙蓉
一千丈。中有採樵者，伐木聲丁丁。
紅塵滿身得暫洗，歇馬坐來聊細聽。

青碧上方

佛塔雙岩堯下瞰，玻璃洲煌煌耀金碧。
梵宮居上頭，山中木鯨時一吼。
山下行人隔林藪，安南使客此經過。
且為君王祝天壽。

棲霞真境

棲霞有真境遠在桂林間春風洞中瑤草綠桃花滿樹
春斑斑羣峰拔地幾千尺上有樓臺耀金碧興來直欲
一登臨王事有程留不得

題重修靈渠卷

吳勤

泮潭之流抵靈川秦人鑿渠通水利累石為堤列陡門
中江一水分為二北曰湘流達洞庭南下蒼梧歸海溼
秦漢而後至於今千百餘年幾興廢我朝洪武丙子冬

繡衣御史遠乘驄奉命重修董斯役規畫晨夜勤丹衷
萬夫雲會爭趨事咄嗟指掌收成功甃就陡門三十六
長堤屹立如崇墉青山環繞湘江曲龍母祠前春水綠
舟航來往是通津灌溉良田萬頃足白雲攀桂架輿梁
千秋峽路無傾覆朝廷興利實為民嚴公執法惟忠勤
豈但寬仁稱使者疏通練達真良臣歸來奏節承殊渥
晉秩尚書縻好爵縉紳滿卷贈雄文予筆高歌寫新作

留題湘江寺

楊基

瀟湘縣前山繞城綠陰滿地聞流鶯入門下馬松徑濕
樓欄花開春雨晴山僧知我携客至身披袈裟下榻迎
汲泉敲火煮新茗茶香鼎潔泉甘清龕燈照佛佛像古
舍利五色真身明黃金布地孔翠帳幃蓋聯絡皆珠瓊
飛來巨石卧青兕以爪扣擊成金聲十年足跡走萬里
福地往往迷榛荆茲山信是無量壽百千萬劫完不傾
乃知願力自廣大天神守護邪魔驚我來作禮繞三匝
寶花如雪天樂鳴便從真如入妙覺豈有世網能相櫻

同行僚友二三輩勸我寫石留芳名他年老眼得再覩
風雨剝落莓苔生

湘筠辭

胡翰

湘之山兮西迤湘之水兮東驚何箇輅兮孔多望不極
兮湘之浦帝子去兮雲中俾夫人兮延佇曾莫樹兮椒
蘭又莫檻兮蘅杜載雨兮載陰滔滔乎誰與度將以遺
子兮琅玕抱幽貞兮永固

七星巖

陳璉

六丁何年開翠岑
穹窿石室高千尋
烟生丹竈人常在
花落碧桃春又深
倚巖懷古成浩嘆
掃壁題詩還獨吟
日華月華去已遠
玉笛誰能傳妙音

過蒼梧峽

解縉

廣西下來灘復灘
三百六十長短灣
潭心綠水緩悠悠
長灣短灣凝不流
涓涓千尺淨見底
隔岸空行魚曳尾
忽然路絕山勢回
峽石水聲如怒雷
石齒鑿鑿森鯨牙
龍騰虎躍鸞回車
我行已過正月半
一夜水生浮漢槎

龍潛虎伏杳不見但見滿江圓浪花浪花飛雪捲萬瓦
船下高灘疾如馬浪船起向空中擊舉舵齊橈不容力
舟師持篙眼如虎指住石頭輕一擲直下水痕奔箭急
老稚憂懷行感泣齒聲剝剝叩神靈拋紙燒香齊起立
為言水淺僅容舫下灘失手爭纖毫水聲怒起兩崖迫
撇旋指顧下洪濤龍君水伯似相曉此水不大亦不小
燒楮瀝酒謝神功好似春遊在靈沼翻思初下象鼻山
怕問行人多苦煩驚心樂水昭平驛慮患防危不暫閒

忽見蒼梧山下日耳聞鶯語自間關豈知平地風波惡
何處安流不險艱此心常似初來日三峽滄溟任往還

採桑化石

彭清

朝採桑暮採桑採桑那得盈頃筐桑芽初萌纔似粟隣
姑把蠶試新浴儂家蠶早未成眠隣家已賣新絲錢羞
將辛苦與人語妾命自知蠶葉比道上何人紫花驄擲
金携玉言從容堅持素志不我變將身化作青芙蓉千
秋萬載江邊立風雨淋漓如訴泣我來此地收遺氓東

筆修詞重嘆息

書臺朗誦

在昔有漁舟結纜石崖下
上有讀書聲朗朗起清夜
詰旦登其處其人已仙去
茲事幾千秋欲窮無所據
我乘一葉泛東流曾于臺畔成淹留
月明散步不能舍但見林木交蒼翠
啼猿愁婦分展卷情益壯慷慨歌聲蓬底放
玉宇高懸萬籟沈川靈為我增惆悵

雲凌斑竹

雲凌斑竹何斑斑云是玉環幼時淚揮灑點綴成爛斑
邇來千有百餘載猶自膾炙於人寰天生異質何顛倒
父母生兮不自保兩傳俱屬姓楊家此事朦朧於莫考
至今楊山麓蒼翠交林木鳳不下兮鸞不棲祇作肩輿
眩人目

南山秋色

青山青雲青欲斷青山缺處雲為幔人家深住鴈東頭
剛被雲遮一多半山兮雲兮畫莫成須臾霞起如赤城

鴻茫秋色渺無際何人能識浮丘生巖巔桂子香飄落
巖下砧聲終夜作青女初傳今令丁琪樹芳陰竟年落
玲瓏日照瑪瑙紫黯淡露消芙蓉死玄鶴飛歸歷魄光
皓素漠漠開溟滓八峰屹峙當窻軒洞府宛似人間天
林楓掩映紅綃帳叢菊燦爛黃金錢平生好奇愛名山
此去彷彿廬山比試携短笛扣山扃身在嶺南圖畫裏

風俗謠

王清

平南雖瘴地風俗猶可觀千家烟火合百里封疆寬男

務耕耘女務織絃歌里巷多儒冠我時承恩鎮南粵分
符兩度來征伐旗影朝飛蛇嶺雲鼓聲夜落烏江月烏
江月落刁斗鳴拔劍起舞秋風生安得貔貅千萬士一
掃蠻峒烟塵清倒挽天河洗兵甲長使斯民歌太平

送胡孟時之官桂藩校理

胡悌

江皋酌酒與君別翠拂河橋柳堪折君歸相見能幾時
岐路分携寸心熟君才卓犖多文章早承丹詔朝帝鄉
一官贊理佐方面宮袍露浥薇花香喜君畫錦還桑梓

戀戀綈袍在知己戴笠乘車古道傍剪燭炊香夜窓裏
垂髫論文如弟兄羨君獨步青雲行渥洼神駒春水見
丹穴彩鳳朝陽鳴嗟予落魄蓬雙鬢自笑送入長作郡
錦軸詩成醉後題玉壺酒滿沙頭盡公家程期不可留
送君直上珠海頭潮迎畫鷁飛去棹花近船窓生別愁
薇垣贊理攄經濟冰鑑秋光杳無際他年考績還經過
花底淋漓共君醉

題王知事蒼梧親舍圖

楊榮

蒼梧之山高崔嵬蒼梧之水青於苔朝雲捲雨凝不散
化為五采天邊來知君攬結入肺腑綺語藻詞生筆下
一從泮水樂優游聲名早已登天府竭來閩藩今幾年
元戎幕下開紅蓮庭闈道遠不可見披圖展玩心懸懸
蒼梧遙遙幾千里引睇沅湘隔烟水慈親鶴髮雙鬢皤
倚門日日長如此忠孝由來難兩全嗟君心事誰能憐
丈夫有才誓許國要令事業垂簡編我時趨京赴西掖
因君此圖情轉劇相思應在玉堂中明月滿簾天咫尺

遊湘山寺

文淵

春深按節湘南州，觀風曉作湘山遊。
一灣流水溪橋小，萬樹長松野徑幽。
古寺巍巍倚蒼翠，林外鳥聲娛客意。
撞鐘擊鼓迎入殿，大衆和尚齊懺悔。
妙明塔下無量師，莊嚴法相如生時。
無色界天去說法，閻浮世界留真姿。
靈草正滿地，白雲自來去。
詢之登甲亭，烟嵐杳無處。
羅浮一片石飛來，知幾年上結真空。
壇下分卓錫，泉竚立巔崖。
人莫測可隘九州，瞻八極胸中百萬江。
湖憂笑指

蓬萊歸未得

贈趙征夷凱還京師

韓雍

桓桓將軍趙征夷人中豪傑軍中師一朝拜命佩金印
提兵百萬來邊陲邊陲蠻夷流毒久保險為巢爭死守
將軍奮甲獨先登百萬雄兵誰敢後陣前號令雷風奔
日色晝暝天為昏馬蹄濺乾荔江水劍鋒斫斷藤山根
免竄狐奔彌百越網羅處處無疎缺坐看羣醜盡成灰
萬里妖氛一時滅將軍振旅歸柳營黃童白叟皆歡迎

自言生長亂離久不圖便見時承平人言將軍有神力
殺氣稜稜厭羣賊賊中遙望畏如神狄青銅面何須飾
滕山磨崖紀厥功賊黨不敢窺其中從茲兩廣正疆界
馬援銅柱翻成空將軍偉烈超今古馬援狄青何足數
聖主纔無南顧憂錫封定見分茅土贊軍臺老不知兵
却喜心同見功成題詩送君凱還去天涯萬里難為情
成化三年春予駐師梧江之潯截竹為杙以障土
階未幾竹復生者三十有三本枝葉茂密森森可

愛從事諸君為予作亭題曰瑞竹予因作詩紀之
此君之性難移植移植從來皆有術子美曾言六月栽
庭堅亦說須辰日醉迷之日移更嘉非時鮮得抽萌芽
如何斧斤斫斷插江潁又見枝葉生枯槎化工生物非
無為異物非妖即為瑞此君素有君子操草木之妖難
比類天兵煌煌南越平邊民垂死皆更生江湖必有棄
置君子起相與戮力匡文明坤軸氣盡回天心真厭亂
生賢濟民兆已彰不信百蠻猶敢叛君不見廣陵芍藥

金帶圍世無此種人稱希嘉祐諸賢應兆起太平勳業
流光輝作詩示我同心人世間有事皆可為鞠躬盡瘁
答明主勿俾前賢專美於當時

送平江陳總兵

偉哉偉哉陳將軍少年學武兼學文養成大才襲封爵
一出便見超同羣登壇小試萬人帥克効勤勞守廉介
簡在宸衷任愈隆開府蒼梧膺大拜來臨百粵氣益充
號令所在皆成功蠻夷畏威不敢起始知世有真英雄

邇聞漕運法多弊况復河乾盤剝費積債年年無計償
貧軍狼狽空吁氣羣情却憶令祖翁當時開創河運通
將軍家法必有得遠期步武收功同廷臣聞此交章薦
仰荷聖聰專倚眷纔看徵詔下嶺南已動歡聲滿淮甸
人情望公大有為公行到日先何施掃除舊習在正已
講求良法須從宜樓船遥遥泛秋水明月流光照行李
道傍擁送千萬人誰不沾巾重稱美錦衣玉節過南京
旋除宿草拜先塋塋前有祠泣且告誓圖克肖延家聲

君不見蕭何關中給饋餉元功位次先諸將又不見寇
恂河內轉運足丹青畫像雲臺上丈夫富貴何足言要
使蠻夷慕風望

成化七年冬戶部主事李君士美奉璽書清財賦
於兩廣廉而有為嚴而不苛賢聲聞於朝即有
員外郎之擢君感激益勵凡兩廣二十郡之地冒
暑雨衝瘴毒早夜兼程遍歷無遺所至人不敢干
以私而搜剔奸蠹無能隱蔽繩之以法倉庾肅清

亦未嘗執已見以及非辜誠才德兼優之君子可
重也于其歸賦詩送之兼致予意

嶺海窮冬變風色瘴烟滅盡梅花白行臺日長羽書簡
載酒遠送朝天客客乃人曹粉署郎早登科甲隨班行
作官今已八九載共誇節操非尋常昨捧天書下南越
兩度歲華猶未歇馬蹄踏遍瘴鄉雲所至無人敢私謁
千倉萬箱總較量寸絲尺縷無遺忘兩藩財賦清似水
英聲先已蜚品廊聖明因此知才器特進一官員外置

遠大從今未可量好與皇家圖濟利國朝財賦取最寬
可堪水溢兼旱乾東南已嗟民力竭西北更苦供輸難
司徒年來亦難處左區右畫勞心緒君還有策莫憚言
報國須當以身許

平斷藤峽

有引

成化元年冬予與太監盧公陳公凌公總戎趙公少
司徒薛公同奉命統兵征兩廣兵戎所加勢如破竹
不旬日而斷藤峽已平賊黨盡誅武功告成題以示

後

人言斷藤峽險峻天下少我視斷藤峽培塿一拳小蜂
屯蟻聚百萬家跣足蓬頭盡徭獠數十年來肆猖獗二
廣生民苦騷擾五征不克勢益張處處孤城未能保聖
皇當天赫然怒選將提兵奉天討內外羣公總豪傑百
萬精兵雄矯矯共言困守非良圖必欲長驅且深搗雷
霆砰訇鬼神怒幾日羣山盡傾倒百鍊鋼刀破新竹萬
里長風振枯槁巖居穴處皆蕩焚瘴霧烟塵都迅掃積

屍如山血如川誅鋤只許留襁褓免竄狐奔網羅密我
軍追戮如芟草大藤根株悉已斷五嶺封疆真再造振
旅班師歸柳營黃童白叟迎遮道自言固望來蘇久不
圖便見成功蚤從今水陸是通衢來去行人免迂繞有
田可耕山可樵共享承平永安好聖皇睿算天助順羣
公整頓南荒了豐功偉績萬古傳附驥成名愧臺老

廣西藩司照磨李景暘孝思卷 倪敬

朝聽風木鳴夕望孤雲飛雲飛木鳴總傷悲高堂人去

不復歸人不歸今幾載痛念深恩淚頻灑親今生我
有成我欲養親親不在遼天白鶴何時來霜林月落啼
烏哀愁心一寸成百結愁腸一日還九迴滄溟有時枯
白石有時爛此情絲絲無時忘直與天長兼地遠

送吳司訓父還桂林

王越

昨從桂林來今從石城去東風萬里一孤舟江水江雲
留不住留不住可奈何勸君滿飲金巨羅酒酣耳熱聽
我歌乃歌之曰父薄宦情兮高蹈子分師席兮善教父

子久不相見兮時以書報既見而樂兮如夢忽覺云胡
又別兮父子相告子願養親兮功名奚足道父云顯親
兮口體奚足較父如是兮訓之忠子如是兮心之孝忠
孝人之大本兮豈獨吾儒之所好當杏花之零落兮言
還許荔子之丹兮可到老我亦思故鄉兮未歸君再與
之會否兮難料聊歌此以送君兮攬明月而長嘯

傳節女吟

黎暹

柳折懷水風花落懷山雨潘家之妻傳家女年少良人

死羈旅旅魂依依旅骨歸抱骨長號骨無語骨無語蕭
蕭後園樹園樹枝頭不得死歸來死向深閨裏許君心
還君身生同枕死同墳夫亡見烈婦國破識忠臣如何
宋代賈餘慶視棄君王如路人

拒賊行

錢溥

古藤逆行四十里白馬浦頭急如矢挽舟方渡十二磯
蠻賊已屯山樹裏兜鍪海戰紛如雲出船仰望疑我軍
高張強弩發毒矢始信賊勢來成羣柴公樓船盛旗幟

賊欲先登豈無計。弮然七矢傷四人。衆皆錯愕。將焉避。
賴公揮刃督其進。善射復數陳。勇士徘徊且却。向中流。
脫此虎口良不易。是時官軍滿哨。船遠視勝負不敢前。
頭哨聞風已赴水。後哨看賊登山巔。賊初凌晨劫村落。
滿船銅鉛意殊樂。忽遇帆檣蔽岸來。竟尋生路將船泊。
我軍有一統率者。勦絕其後解。諸縛忍使媚女并幼男。
盼盼青天去從惡。計不出此心茫然。賊反小視來侵虐。
親身目覩尚如此。道路傳聞誰復許。寄與征夸大總兵。

將士勇怯當先取

送嘉禾伍公矩歸桂林兼問訊海鹽張靖之

丘濬

平生故人伍公矩少年學文今學武胸中豪氣文心豪
境變情遷寧少沮酒酣耳熱歌烏烏手執如意擊玉壺
興來拔劍為我舞電光燭歛雲披敷仰天大喙向人語
顧儂豈是噲等伍筆端一萬丈虹霓胸次三千歲今古
憶年二十三十時風中快鷗囊中錐廣寒紫桂白手斫

滇池綠駿赤脚騎奉天殿下丹墀底頃刻雲烟生滿紙
璫林宴罷馬如飛一轡穿花三十里功名富貴皆等閒
致身承明殊不難覓得一州如斗大又被秋風摧紫蘭
瑤簪玉筍山如畫靜倚韜鈴意閒暇堯山祠下拜放勲
干羽兩階祈日化絳灌之武隋陸文今人未必下古人
長籌入手一運轉溪山失險鬼不神李廣數奇顏駟老
攷弓束書尋舊道英雄回首即神仙忙處人多閒處少
青天浩蕩雲渺茫吳山高兮粵水長南歸若見張給事

引杯燒燭歌我送行章我亦頭顱如雪白每憶故人心
惻惻明當歸棹過嘉興看劒撿書話疇昔

送進士蔣昇得告還全州

平生故人河西宰宦轍所至多遺愛用才不盡慶有餘
天意分明祿有在二子食報非偶然一日聲名播中外
大者如麒麟頭角定趾無非仁小者如鳳凰胸臆羽翮
成成章奉天殿前試制策文彩翩翩聲赫赫人家得一
已為多同氣聯芳更奇特仲也讀書道中秘飲食坐卧

皆文字伯兮賜告榮故鄉周旋舉動皆恩光人生生子
有如此地下有靈應亦喜昇兮昇兮今汝歸歸拜先塋
為致辭後死故人無恙在鍾情還似有生時

崑崙關樂府

李東陽

崑崙關頭戰骨枯龍衣染血紅模糊軍中喧言老儂死
不是彼儂焉有此將軍貴實不尚功世上焉有將軍忠
君不見漢王一赦軍中守武將紛紛皆藉口

麥黃歌

包裕

大麥黃小麥黃家家男婦登麥場老者看家壯者出旋
挑野菜煮羹湯男鋤女刈不辭勞麥場堆積如陵高烹
雞打餅薦先祖沽酒擎罇娛父母舞者舞兮歌者歌胥
言收穫今頗多忽聞官府里胥至征討夫錢征夏稅須
史算盡無了遺老稚含悲欲訴誰共誇今歲麥秋好孰
知反得一日飽好將民隱達聖朝搏節財用寬征徭古
來民足君須足莫使民有逃亡屋

贈桂林劉孝子本

張駿

誰謂天不明有目能窺孝子情誰謂地不靈有心能種
孝子名吁嗟桂林劉孝子欲使天地俱長生蚤歲趨庭
學詩禮堂上白頭甘滫瀡發跡魏科都美官龍勅恩頒
紫泥璽銜哀歸訃白雲廬麻衣露肘頭不梳瘦骨如荻
面如墨青松自植草自鋤落日寒烟鎖枯木野狖山猿
相嚮哭手持喪禮一編書口不成章眼能讀可憐植物
如有知蓮花並蒂開荒池縞素亭亭裏朝露欲語不語
雙含悲蓮子不成蓮葉老莓苔滿地無人掃酸風苦雨

墓門前靈根秀出三芝草牧豎樵丁時往來忽見鬱鬱
塵襟開共言孝感有如此歌誦遙聞都憲臺于時藩臬
衆夫子目覩徵祥心溢喜交章入奏動冕旒詔許華坊
耀閭里我生旌表三義門一飯不敢忘君恩臣子相期
兩無愧忠孝由來同一源況是堂堂大明世禮樂衣冠
堯舜治澆漓風俗盡還醇白叟黃童飽仁義君不見天
有目地有心公道瞭然無古今竹帛聲光照天地海嶽
與爾同高深

至柳郡寫懷

桑悅

憶昔宗元留口語罪人方渡湘灘水我生自少知貴重
垂老投荒六千里自衡抵桂歷險灘寄命蛟龍吞吐裏
又聞到郡路梗塞帶累妻孥愁欲死桂林地主與別駕
深感豫先尋屋宇老妻借住且安穩釵釧權宜易薪米
總戎相厚發軍符捧檄獨行豈得已各堡嚴兵爭護送
滿地干戈人似蟻右江分憲蒙菴公下士傾身衆莫比
予為屬吏蒙愛厚永福庭叅儘歡喜接哨將軍金子容

舞劍雪花隨地起隨行健兒經百戰賊衆聞名自披靡
慶遠太守先赴水中青雀途隸駟牛擺灘頭獲生擒
長繩反接牽回市兒童爭欲瞰其肉黃鷄入籠亡爪嘴
各營夜闕不成寐何況雨聲清滴耳明朝行到海灣浦
大帽隨風去如矢子容呼作落帽洲嘆息官軍殲於此
去歲長沙衡州官軍戍此地多被殺深定江邊險煞人淺瀨爻爻石齒齒
崖前朱草官吏血商賈疊屍崑谷底匝山先鋒特揺手
似報箐中諸賊徒林深埋伏難盡搜首過還防截其尾

曉度旌旗筋竹嶺衆賀今朝保四體洛容縣裏召魂魄
對酒狂歌聊復爾郡堂清冷似僧舍邊境深難立綱紀
離城十里是生獐通衢處處生荆杞打村劫路聞暗熟
里半居民存有幾叅戎守備日籌畫據險賊巢難盡洗
孔子居夷豈兵革大舜格苗舞干羽此意汪洋似海深
愚生安得窺涯涘每逢村老善告語天子仁恩決遐邇
昔年擣破斷藤峽十寨九空皆自取爾傳吏語歸告戒
鎔劍為犁事耘耔舉頭似領心不然習俗為非是生理

常聞老子之流沙玉融何曾枉仙趾
崑中結乳為寫真
幢蓋前頭印其履如何化俗不化夷
平盜何能傳法旨
象臺白雲裊成象我欲乘之詢太始
當時不降犬羊種
百粵道路平如砥古屏水冷結幽亭
三月笙歌賞桃李
生人何故陰氣雜中州亦不純君子
若令四海盡雍和
化外瞻天如尺只天公果肯答因由
但願銀河下雙鯉
夏日收糧有感二首

柳州五月開軍倉大家小戶仍納糧
白粲如珠堆滿場

府君監督當廳量汗珠垂垂日當午天孫錦裳污塵土
君不見邯鄲才人嫁為廝養卒婦遺事千年傳樂府

婦女持箕來逐逐每言某堆雜糶穀府官聽信令歛颺
粒粒圓齊方上倉青蚨入手手先軟掀弄明欺府官眼
會籌上簿人憧憧糶穀還入原堆中嗚呼世間此弊那
能革安得南海觀音手眼俱千隻

遊老君洞

陰陽無端更去留世間盛福難全收古人一麾恥外郡

今我半刺來邊州到官未久出按縣滿眼猺獞森戈矛
誰知造化默相補玉融山水何清幽蒼崖翠壁老君洞
健非巧宦能兼遊萬年乳成滴白柱一卷溪畔眠青牛
真仙遺迹覽不盡散髮坐石臨清流灑然形質已自失
欲釀溟滓觴浮丘襟懷浩浩隘八極身外何物非輕漚
數聲長嘯下山去幾點白雲天際頭

齋榜謠

上司出榜安獞猺軍民激變法不饒為頭最禁打烟竈

狼虎身上搜脂膏市人得榜心獨快竹筒束縛青絲帶
昂昂意氣似領敕借馬星馳下村寨倚官托勢情萬千
籠雞沽酒相後先水間一棒沒痛癢戶戶又科齋榜錢
夷人文字何曾識鄉老落來遮屋壁

長命草

龍城山中長命草采采黃花顏色好懸崖挂壁常發生
朝暮搬移不枯槁歲寒獨見栢與松非時欲植難為功
爭如此草出凡質淨洗塵土根虛空世間物變無不有

杵地成羊樹生酒

龍門灘歌

陳祿

懷城三月龍門灘飛流仰視高於山
神魚泝流西北上到此揚馨如等閑
一聲雷三汲浪電光橫掣三千丈
眼中靈變難為狀頃刻風雲九天上

蒼梧席間呈謝大叅段都閩

陳獻章

蒼梧城中三日雨曉坐肩輿辭兩府
叅西藩者謝大夫枉與段侯同出祖
麻衣搭颯濫西席對坐一丈兼一武

三人相逢豈易得一金便作華筵主酒酣擁面回仙亭
立馬蒼茫別容與

平南謠

張瑄

平南縣前江急流平南郭裏人烟稠孤垣雖與賊隣境
民貧固守恒無憂驅我成城者誰子攫取官錢大半歸
盜心覬覦民心離高壘深溝舉難持妻孥戮辱不足嗟
獨憐累及貧民家江水不能流恨去荒烟白草啼寒鴉
貪墨敗類亦自敗將謂成家反成害嗚呼慢藏永為愚

者戒

撫徭歌

區昌

何年政令苛且煩我民棄業投深山
弓刀雜居夷與蠻欲悔無路何由還
天子仁明照八垓有如妍媸臨鏡臺
不以刑威奪恩愛故遣縣令勤招來
勤招來意甚長捐爾刀與鎗飾爾中
與裳挈爾妻兒復爾土鄉爾田爾莊
爾稼爾桑我蠲爾差除爾糧爾不悛
兮爾自戕爾尚歸來來莫遲我有賞
犒爾私爾尚歸來來莫疑我心誠

信天所知攜扶老幼登縣門享我紅酒及牛豚爾老有子
子有孫同歸壽域同天恩

勸農歌

東城春氣和氤氲農蓂停爾耒與鉏聽我勸農歌民
生百藝農為好上天養人穀為寶深耕易耨貴及時我
勸我農休草草我農務本慎勿猜細民衣食何由來天
子在上耕籍田田頭把耒猶三推土膏既肥雨新足轉
頭還見黃雲熟狼籍登場男女喜先輸官糧免催督免

催督家亦充黃雞白酒里社同縣令勸農還慶農擊節
為爾歌年豐

斷峽藤

程敏政

廣西徭人自大藤峽蔓于東入雷廉高肇四州遣師
討之寇平作斷峽藤

斷峽藤克蠻嶠破頑陰發靈曜薄海四隅皇德冒叢爾
醜背聲教皇人旅興殄爾暴蛇豕平捷屢告山殷殷波
浩浩舟車來嶺南道清二廣睿謀造

答邕州別駕鄧誠之

湛若水

美人昔別藤江湄
藤江山前雲滿溪
翳門關外春草萋
王孫王孫歸不歸

龍州詩二首

龍之山不興雨雲
山中之人不可以
論烏用如城屹高
旻祗可以障南氛

龍之水亦流東荆
水陽之氓不可以
情烏用如塹流南
溟惟可以洗甲兵

送孔憲副赴廣西

吳寬

十年大夫官亦榮蕭然被服仍儒生胸中自有萬人敵
何勞掾甲兼操兵嶺南羣蠻首猖獗干戈滿眼尸縱橫
連民竄伏遍荒野高州殘破餘空城是時君來作民牧
仰天誓欲安黎氓身騎羸馬從孱卒瘴嶺惡谿循數程
羣蠻望見遙相驚我來惟仗信與誠片言開諭纔脫口
馬前羅拜咸輸情腰懸木牌悉聽命手斷藥矢誰違盟
弱男寡婦免係累山谷日昏猶哭聲惟連惟高我守令

汝撞汝徭吾父兄軍中主帥驕心萌謂此已降皆可刑
獨將一身保萬口迄今軍旅休南征君於異類且有德
斯民眷眷能相傾祝良張喬世重見人物信是吳中英
外臺遷擢終借寇上國追隨爭識荆同鄉數聆情話好
偏怪不肯誇功成邇來用兵貴神速時有威寧海之襲下僚旋
踵登公卿以君累歲出死力有司豈合先知名迢迢桂
管古所置領檄再作西南行投荒歷險自無怨公道藉
藉歸時評奇功聊爾錄一二碑文敢擬淮西平

洮水行

蔣冕

英徒破走長沙國吳臣誑誘亡奔越漢軍追擊至湘中
布兵大破洮南北史記高皇十二年特書本紀司馬遷
漢將不因來此勝區區洮水名誰傳後來武帝建吾邑
遂以洮陽定疆域由漢相沿直至隋閱歷年華幾千百
洮水東流營水西九疑山與楚雲齊咫尺舂陵路非遠
尋源我欲溯瀛溪

古塔灘

魯鐸

古塔灘注山窪飛湍屈曲如奔蛇中流惡石故激怒跳
珠濺雪紛交加鏘鏘爭走萬甲士刺刺倒露千狼牙官
舟一葉百夫挽安危祇與毫釐差我時攀崑過絕壁四
顧莫非猿所家倦來坐石却俯看握拳吐舌生咨嗟九
龍山史好奇甚哦詩但道山水嘉更嗔來日舍舟去磨
崖不及親鐫過

全州古松歌

嚴嵩

全州古松大道邊白晝暝色行蒼烟谿迴路轉不知數

直至興安陰接連蛟龍拏空勢欲舞往往呼號作風雨
大枝曲鐵小枝盤偃蹇突起如相忤時復一株罹樵斧
槎牙無枝形獨古誰裁此松經幾禩國初太守名猶記
勝蹟曾留學士題繁陰長與行人憩松風泠泠山寂寥
松月皎皎明青宵遙想山中風月下定有鶴仙吹玉簫

粵西曲

顧璘

白豕兮黃羊竹挺挺兮莖方顧異物兮心潛傷我何為
兮客殊方北風吹衣兮思故鄉

湘山寺同客作

一麾迢遞天南頭名山頗愜平生遊日飽窓中列岫色
更起策杖窮巖幽窈曲烟霞入空翠招邀不識神靈意
自從竄逐得逍遙始歎風塵昔蒙昧升堂笑問無量師
兩住青山今幾時翻經願從弟子列洗鉢愧乏頭陀姿
誅茅小乞巖前地痛飲狂歌日來去聽法閒看虎伏時
懷鄉莫近猿啼處幽花細竹俱堪憐燒丹服藥期長年
費公未啟王屋鼎華老謬語天池泉神仙渺茫竟難測

古往今來豈終極但願道路風波平江上故園歸即得
湘江行寄孟侍御

逐臣遠繫湘江上散髮行歌日悲壯郡門江水急東流
解宇山雲作炎瘴去年花發悲陽春今歲花開更泥人
種瓜不及青門客懷橘空思白髮親少年意氣干雲起
中路摧藏乃如此徒勞嘔血走風塵不救折腰臨督史
桂林夫子舊同心獻玉君門共陸沈千首楚歌猶跌宕
一瓢顏巷自蕭森春風閉戶意何如遙遣嬌兒奉素書

尚蒙大府明公檄莫惜荒城使者車

同海陽舒教諭登湘山絕頂因贈別

兀坐不快意起登湘山頭
九疑崢嶸忽到眼洞庭湘浦
遙爭流盤空蒼磴路險絕
四月爽氣疑清秋波濤微茫
指南海彷彿十二仙人樓
欲行更止魂惕慄聲動河漢
驚牽牛舒君好奇更豪宕
攀援絕壁枝撐幽拂拭苔花
坐崖石把酒長笑觀潮州
下窺城郭彈丸小但聽兩耳
風颼颼西瞻蒼梧弔虞舜
滿江淚竹湘靈愁尉佗孤墳

竟誰是紛紛白草埋荒丘憶昔樓船下南粵連天雪甲
橫戈矛祇今陵谷已非昔況乃楊僕諸王侯古今成敗
等翻掌天地逆旅俱蜉蝣與君且醉蒼玉甌對面但喜
莫復憂明朝解纜靈川水却望湘山思舊遊

謝平樂張太守惠蓮花酒

暮冬雪寒風飄飄湘城凍酒甜如蜜傾盃欲飲復推去
空對江山坐終日灘江太守神仙人雙鬢遠致蓮花春
開軒曉起試三爵頓洗百斛胸中塵高歌梁甫曲脫却

淵明中眼前萬事底須問且從爛醉陶吾真

顧全州見邀江水漲不能赴
孟洋

桂林山深晝啼鵲一春三見紅日出鳴雷達曙雨浪浪
洪潦平階仍入室江間波浪蛟螭翻鯉魚安得窺龍門
渡頭行子立惆悵徒繫扁舟不可上美人只在水一方
百遡千迴道轉長雨中空見枇杷落飛盡楊花更斷腸

湘水歌

并序

我聞越人去國見形似而喜仲尼適齊聞韶樂而歎

豈不以希音難遇良晤靡常也哉昔東橋直道謫守
湘州賤子多辜放流桂郡慚非郭李之儔竊幸同舟
竟等參商之迹仍悲各處顧卿懋涵東橋公之子也
乃乙亥正月浮游桂林將命若翁下迎賤子明悟若
神才華如海素質資于庭訓青年邁乎等夷造霸容
儀豈數令狐之兒過戎良久敢謂嗣宗之鑒竊附古
人托交小友宵談以希旦夕遊而自朝興緒雲長辭
氣鋒出冠服生洞壑之光題詠盡江山之麗氣孚趣

同蘭深膠合此豈徒見似之喜聞樂而歎者哉嗚呼
飄蓬蹤迹不可以常折柳心情孰不云苦烟渺渺而
碧蕪遠花霏霏而黃鳥鳴迎落日以舉觴逐征雲而
解纜矧余一枝之棲未安萬里之心常繫惆悵臨江
徘徊送遠卿亦莫賴余復何堪維茲傾城賢士洎吾
在門小子咸覩翔鳳之姿各贈登仙之咏余亦作歌
并序諸首用酬君子青瓊之章敢辭鄙人白豕之誚
乎

湘水綠色波瀾瀾石樹參差岸烟起芳洲蘭葉搖香風
日暮千林萬花紫春無鴻雁隨陽和晝見獼猴挂薜蘿
谷深疑有秦人住澤畔時聞漁父歌獨愛蘇吳顧虎頭
謫官五馬來湘州郡中無事常高卧忽復乘舟泛碧流
酬邀明月不知返曲奏陽春恒寡酬神簡郎君更清出
小顧阿髦誰甲乙陳荀王謝久塵埃君家一門皆俊才
班揚已去蘇李死氣運文章喜再回德星遠向庭闈聚
堂上春陰覆瑤樹柳山雲物春更嘉翠竹寒泉啼鳥譁

昔人尚有讀書屋君復題詩躡紫霞

送平樂李太守致仕還汝陽

桂水生炎雨湘山暗夏雲他鄉一見面明日復離羣垂
楊萬縷縈愁思芳草萋萋兩何意須臾日暮孤帆開別
酒千鍾那得醉昔乘五馬中原來今日還乘五馬歸神
明太守有高譽奔趨白首奚為哉君不見秦時丞相顯
泣顧中兒憶黃犬君不見漢代淮陰強後車仰歎良弓
藏曾參殺人惑慈母董龍誰敢呼雞狗樊籠一躍天地

寬榮辱縱橫我何有憐君鬢髮猶未絲五湖三徑將安
歸清泉白石滄洲夢赤日紅塵誰是非吾州山水連君縣
我住君還淚如線搖搖旌蓋過吾閭我有雙親君得見
左州元惡就擒州印復還偶成口號

鄧炳

何物癡兒膽如斗敢取銅符獨懸肘效尤武仲要魯君
僭擬平盧襲留後冒姓已步衛青塵禦人更出黃巾右
逋逃相繼遺妻孥耕鋤無數荒菑畝廬舍滿眼麋鹿場

牛羊絕迹靡無數讐深恒作林甫遷計窮惟事檀公走
轅門軍令應加誅邊境夷情宜善誘寬柔已示再生恩
迷督不懲難追咎懸賞感激勇士心面縛立致壺城口
身卧桁楊悔莫追罪服上刑甘自受兵不血刃俄成功
印失中書仍復舊黔驢逞技將誰欺穴鼠抱金竟奚有
窟中狡兔終難藏釜裏遊魚寧復久寄言奸宄休喧阗
逆豎叛藩咸授首

粵西詩載卷七